

乾隆歷城縣志

歷城縣志卷第十一

建置考二

壇廟

周官小宗伯之職掌建國之神位凡社稷宗廟山川邱陵墳衍皆為之兆誠以事神有所而人志自肅故曰建保邦國也

國家釐正祀事凡天神地示人鬼之祭皆擇日致齋載在會典今必謹紀其地與其修建遷移之歲月以云虔也其有不列祀典而舊勞於斯土既沒而人祀之者雖半涉傾圯亦附載焉

社稷壇在南門外祭以歲春秋仲月上戊日

按舊志在德府前西南向

晁補之齊州祭社稷祈雨文吏慢不德無政事無以奉社稷而臨民人夏潦為災此邦之失業未復者戶十一二且他邦之轉徙廩食者寓焉今冬又不雪至春不雨將大飢疫吏何以為吏民何以為民神食於其土吏可罰民不可窮也何為使至於此極哉顧吏無辭以謁於神而誠可哀庶幾潤澤沛然一灑之尚

饗

雞助集

風雲雷雨山川壇在南門外祭期同社稷

按舊志山川壇德府前東北向祀境內山川風雲雷雨旗纛城隍諸神

先農壇在府城東郊雍正四年建祭以歲仲春亥日行

耨禮

岳通志

城隍廟縣治東制極閤麗嘉靖十七年重修殷士儋記

天啟七年知府樊時英重修崇正十二年燬十三年住

持道士張仁善募化重修

舊志

陳修重建城隍廟記累皇帝即位之明年海內鋒鏑既息物衆地大撫時康寧而雲蒸霧滃神明陟降之理惻然於懷故令有司治城隍之祠錫封號以彰神

德仍遣使具牲牢分祀焉。濟南古齊州。今天朝改濟南府。建山東行中書省。以總庶政。時叅知政事盛公原輔安公。然以粹德崇望。出鎮藩服。下車未久。顧城隍廟在城西偏湫隘。頽庳移神像於歷山之顛。時洪武二年二月十二日也。越十日。陳修承命來守斯土。叅政公謂曰。城隍廟雖移置高爽。而未駭瞻仰。當亟葺之。修集士民告之曰。今天子聖武治民。以明事神。以誠令有司作神之廟者。以鑒時政。以福斯民故也。且木石瓦墁咸未畢具。士民其知乎。皆鼓舞歡呼。捐粟帛不數日而輪奐畢。政三月十九日。禮部使者賁

誥命來封神為鑒察司民城隍威靈公是日以羊一
豕一簋冀陳設如典禮同知濟南衛郡都指揮使司
事陳勝及修與郡縣百執事皆拜禮於庭事竣而雲
陰四合翌日驟雨如注晝夕不止溝澮皆盈境內黍
麥焦槁者皆勃然蔚興是知天子之誠誠神明之答
報交接於雲雷屯昧之時奮決於天人響合之際又
非尋常可以數計而龜卜也是不可無記

據碑

薛瑄重修城隍廟記畧太祖高皇帝握乾符之二年
稽古建制以為天下郡邑必有神以司其事故封神
監察司民城隍威靈公錫之誥命以彰神休仍遣使

祀以牲牢舊祠在城之西偏前守陳修徙置今地作
新廟貌迄今九十年皇上正位勅左副都御史年公
富巡撫山東時巡撫監察御史郝公某謂郡守陳公
銓曰明有禮樂幽有鬼神陰陽表裏列土是賴神之
安口郡是圖矣口口以為已任捐資拓其址得古
之柱石協今規制即日撤其舊葺為後寢作正殿十
六楹高四十尺深廣加倍東西兩廡各二十四間序
列諸司寘官善惡報應之像以化強梗弗率教者自
歲己卯三月朔始事至秋九月望畢方其經營之初
公綜理勸督內盡其心治郡比三載既新其學宮又

新其壇壝凡在城之應祀廟典皆廣而新之然後大作是役易敗為成易卑為高易樸為華落成之日望憲藩臬率謁祠庭旱澇災傷有禱必應皆神之佑也推官齊公魯恐久而泯其重修之由徵予記之太明天順四年歲次庚辰春三月朔旦文林郎濟南府推官鴻門齊魯立石

同上

殷士儋記粵稽載籍城隍之祀前古有之其秩在禮官為天下通祀實自聖朝始我太祖高皇帝統一六合詔定京都及天下城隍封爵其在各府曰監察威靈公秩正二品袞冕九旒九章命翰林撰制詔頒之

尋令儒臣考正諸神位號止稱某府城隍之神詔曰使神聽命於天諸鬼神聽命於神庶權綱不紊也京都城隍廟成山東諸省城隍之神序列廟門內然在諸省第以府稱無以省冠者州縣各有專祀惟附郭不更設濟南山東省會首郡也廟建自洪武初凡省臬貴臣郡縣長貳諸執事始至一如令甲矢神曰所不恪共神其殃之春秋有事山川社稷載其主合食於壇水旱疫厲寇雋則省臬大夫或巡撫命使輒督所部叩禱惟謹蓋視他府禮式崇異矣按碑記廟經有司修葺者四自正德辛未逮今又五十年久漸圯

敝公帑告訕謙畏因循靡任厥事者規制大壞弗稱
百戶王永智鄉民孟詳輩二十有八人爰始倡義協
葺仕持王明儉白於諸司咸聽之且各踴為助宗藩
特出帑金鄉大夫士民罔不樂輸翕贊乃庀僦材工
自正殿配殿兩廡大門二門鐘樓鼓樓香亭甬道龕
壁軒楹繪塑儀像齋宿庖厨諸所悉撤而新之始嘉
靖辛酉四月至明年某月告竣壯麗完美煥然改觀
過者慢惕儼乎若臨祝釐祈歲公私咸賴鄉進士崔
君元吉為狀其事醵予記之予嘗觀我國家所頒郡
縣條章蓋祀典惟首事夫歲時走謁疇不躬親敝陋

乃縣曰廟額府祀也胡敢與府曰工役縣責也非可
侵出內虞其叢毀動衆懼其賈怨胥諉胥戒苟倖遷
代以俟來者噫天下事坐視而廢滋多矣彼其飭供
具儲待求稱監臨部使者意率單衆人數千產不靳
甚乃剥下自封戕虐顛殺未聞少自嫌畏此獨曰不
敢何也閭巷之民一倡衆應非藉威令督迫之資庫
不煩一錢官不徵一夫數十年之墜缺一舉振起無
難者廢興存乎人哉海岱鉅邦百執事具列而政務
首事自二三韋布底其成予嘉其志竊因有深慨焉
乃為次其歲月俾刻石識之庶後之觀者有所儆也

志

孫光祀重修濟南府城隍廟記畧郡邑之有城隍猶
之有守令也天下附郭之都城隍祠宇類皆分郡邑
而濟南獨有郡無邑豈其統攝於一與其神威靈素
著昭人耳目即近年表善良之寃而顯強暴之迹者
已指不勝屈廟之立已多歷年所昔年曾燬於火幾
經重修止復燬無門廳之成規舊制而寢宮之器物
未暇及今則殿瓦碎漏廊柱欹側而官廳齋房均將
就圯又遑問寢宮之器用什物哉太守蔣公修廢舉
墜百為具興爰捐俸修葺並集同官及郡紳士民之

力而合為謀以成之皆復其舊將來之過此字者觀
廟貌之森嚴不覺其善念頓興而惡念潛消未必非
神道設教之一端也於是勒碑而記其畧以為好善
者勸焉康熙三十四年八月初六日

膳餘軒集

郡厲壇城東北一里今圯考舊典蓋郡大夫主其祀

舊志

厲壇明初定禮以城隍神位主之列無祀鬼神於旁
預於三日前牒文告請至期恭導神駕詣壇祀以清

明七月望十月朔

府志

五龍壇在府城西門外舊有龍潭禱雨於此

陸通志

龍潭禱雨多應建宮祀之知縣張鶴鳴重脩

舊志

五龍潭祀五方龍神

志通

趙本重建五龍堂記畧歷下名泉衆矣獨在城凶有潭深且濶故老相傳以為斯淵有神龍故曰五龍潭歲有不雨旱暘物槁民有感色官守致芻禱於神者無不感應潭西有神祠年深傾頽百姓欲營弗克適至正壬辰徐淮方閔天兵南討聖天子以山東鄰淮徐之境憂及斯民乃命縈丈長西夏楊公都水使者王公使憲山東下車之始監憲楊公謀諸同寅以閏三月築城率僚屬致奠於神祠禱曰神之靈佑斯民者溥矣今有事於城願無淫雨無亢陽無癘疫如沐

神休請新祠宇至九月城工告竣歷三伏之暑役夫
萬數而不聞一人嗟怨之聲隨委吏宋思祖李紹祖
偕濟南府官達魯花赤等史麻景瞻崔工鳩匠撤舊
創新之堂基疊土增舊三尺廣袤有加周砌之以石
構堂四楹高明翬設一切扉牕壁飾無不丹碧重繪
神像無塑正形槃礴蜿蜒梁柱之上堂之四墀曩者
沮洳不克垣茲以石為墉址自水痕甃起上接以甍
覆之以瓦仍樹櫺星為大門門之內甬道如矩以達
堂所又葺東亭西廡為官府期會風雨之庇越明年
癸巳孟春之望工畢嗚呼非神無以澤斯民非監憲

無以感口神也公名文書訥字國賢自號雙泉凡三
來憲齊魯憲使王公口口字口口憲副滿速兒公字
正臣憲僉環州閭公字周卿韓公帖木兒不花字仁
迪口量公字士口經歷答缺四從古知司劉君清卿
字士廉照磨常君伯安凡歹字仲賓皆贊成其事守
祠黃冠曰德緣祠宇興建始末不可有遺墜因記之
以傳悠久碑據

崔應階重修五龍潭神祠記出城西門渡灤水數十
武折而北可半里泉源競發其大者曰江家池又北
匯為五龍潭潭西有龍神祠元至正間碑載神多靈

應監憲楊公文書訥大新殿宇其後因禱雨而重葺者明萬歷二十七年張令鶴鳴四十五年巡按畢公懋康熙四十六年巡撫趙公世顯五十三年巡撫蔣公陳錫布政使侯公居廣皆有碑其無碑者且不知凡幾蓋祠之建久矣予撫山東之四年夏不雨禱焉而應因捐俸如千金劄歷城胡令德琳撤祠而新之工既竣又於祠東得蔣公靈雨亭故址愛水木明瑟之勝并屬胡令復其舊因考水經注有云灤水北為大明湖湖西為大明寺水成淨池池上有客亭齋乘謂池今名五龍潭則神祠故大明寺靈雨亭故池

上客亭也亭方作而予移撫福建瀕行胡令請為記
將刻諸石予聞古人言天下之善不必已出況區區
興築之小者耶予既不敢忘神庥又知胡令終能成
予志而後來者之游觀不啻予之樂之也胡令方輯
縣志故稽諸前載俾有所據焉同予禱雨而助其役
者則布政使梁君翥鴻按察使勒君爾謹濟東泰武
道鄭君大進鹽運使張君鈞濟南府知府徐君績同
知王君鶚例得並書乾隆三十二年閏七月丙午巡
撫楚鄂崔某記

八蜡廟在府城南門外

陸通

南門外八蜡廟後廢張令鶴鳴創建於東郊淨居寺

旁

舊志

張鶴鳴重建八蜡廟記
畧古之吏權在哉今之吏權在人制古吏法簡而吏淳制今吏法密而吏澆漢吏至長子孫一切便宜嗣其報政三異五袴之盛非獨吏最蕩佚簡易風效然也今繩吏惟三尺耳一有營建上疑侵漁之數下避侵漁之嫌故寧墜典荒民袖手坐嘆即賢者且效尤矧庸吏乎古者明王重蜡予至歷即尋蜡廟父老曰廢不記年舊址在城東景陽湖西今為墟墓場矣予謀欲建之新桀零積延及五

年甫庀材集工即其故址創為蜡祠損益盈縮皆已
意為之毫不勞當事慮嗟嗟予留意於蜡者也尚經
營五年而方告成倘予視事一二年去則此意竟為
畫餅矣予幸在境五年備與茲典歷民始知有報本
反始息成送終之義因記歲月於石見蜡之廢興有
時而深感於古今更不相及也

據碑

王俊重修八蜡廟記畧歷下蜡廟不知始於何時明
知縣張鶴鳴自南門外移築東郊景陽湖西畔乾隆
四年秋予承乏茲邑欣穡事之有成乃謀與民舉蜡
事而廟貌缺焉詢諸父老則張之所建久已圯廢五

年春遂復其址度其材邑人張燦孫讓等復力相贊助越月而工畢今而後歷民咸知報本而予亦可以

謝責矣乎

據碑

旗纛廟馬神廟俱在府城南門外演武場

新志

火神廟在府城南門外祭期以每歲二月二十三日

正武廟在府城北門內大明湖上祀北方元武七宿春

秋致祭

文昌廟在府學崇聖祠東祭期以每歲二月初三日

以上

似岳通志

舜廟濟南府城第一坊按圖經古舜祠在廟山舜井在

山今廟在井旁有宋碑城外古舜坊即廟山故道

歷城有舜山祠

魏書地
形志

舜廟在府治西南

陸通
志

舜廟南門內宋元豐間修天順間重修學士薛瑄記

崇正壬申火朱公大典命貴令養性重修

舊
志

曾鞏齊州到任謁舜廟文維帝側微之初躬耕此土

歷數千載盛德彌新傳於無窮享有廟食鞏受命出

守敢陳薄薦維帝常垂陰施惠此困窮庶使遺民永

有依賴

南豐
文集

薛瑄舜廟記有大聖人之道而功被於天下萬世者

固宜為天下萬世之所崇奉若濟南府之有舜祠是已舜耕歷山史記以山在河東今濟南府歷城縣亦有歷山故後人因立祠焉大歷山之地不足深辨舜以大聖人之道功被天下萬世人得而知之則濟南立祠以致崇奉者夫豈過哉正統初瑄以菲才濫官山東憲司嘗進謁祠下因追仰聖道於數千載之上今去濟南二十餘年矣方以老病退居河汾山西憲使王允郡人也以書來曰吾濟南故有舜祠歷年滋久木瓦腐漏不可以妥神揭虔天順二年都院右副都御史年公富巡撫山東因謁是祠見其圯剝之甚

建諸藩臬官僚曰舜大聖人也是郡之人既立祠以
崇奉而屋宇弗治如此幾於慢矣曷圖所以新之又
二年為天順四年於是都憲洎藩臬以濟南知府陳
銓才可集事俾董祠役銓量材計工自殿寢廊廡以
及外門次第俱新宏廣壯固皆有加於前時又擴其
隙地繚以周垣幽邃清肅允稱神棲廼始事於是年
之正月逾月而工訖夫斯役也實乃崇奉聖神而有
關於世教不可無辭以紀其事敢可文俾刻之石以
垂永久瑄念數十年前既嘗謁祠下而追仰聖遺今
茲之舉固宜有言夫舜之所以為大聖者以其為人

倫之至而精一執中乃萬世道統之源禹湯文武之
君臯陶伊傅周召之臣孔曾思孟以及周程張朱之
聖賢雖行道明道之功不同而其相傳之心法實皆
邇其流是其功被於天下萬世者曷有窮哉今聖朝
方以有虞之道治天下薄海內外咸底休風然則是
祠之新匪徒崇聖道於往古實有以仰若聖朝為治
之意有關於世教也遂書其事俾刻之

陸通志

宋憲昌拓建虞舜廟碑記畧考禮維濟南有舜祠建
自勝國時天順間巡撫年公因其圯剝葺治之越經
百餘載復就圯逮我皇上龍飛改元巡撫衡水博公

巡按溫陵吳公暨藩臬施公等行習儀故事周視而
嘆曰茲祠崇祀先聖而若是陋乎屬守郡平公度地
庀工物宜程能檄諸帑之羨以充其費俾許丞督是
役以經以營以飭以繕高其殿陛廣其門庭廊舍環
列夾兩階序罔不煥焉一新又峙寢宮於旁亭歌薰
於後皆倣舜往事創建者門南向改闢寬敞樹左右
以坊者各一左額曰重華協帝其右曰大孝格親繚
垣以外增公署十餘構為朝習時宴息之所鳩工於
甲戌春之二月迄乙亥季夏成事應昌承乏濟南適
觀厥成茲膺新命戒行許丞請予記其事大明萬歷

歷城縣志 卷之二 一
八年歲在庚辰春三月朔日立
碑

娥英廟

歷城有娥姜祠

魏書地
形志

灤水俗謂之為娥姜水以泉源有舜妃娥英廟故也

水經
注

按娥姜水姜一作英魏書娥姜祠或係娥英祠之
訛

娥皇女英祠在趵突泉今廢曾子固詩層城齊魯衣

冠會況有娥英詫世人俗人但知呂仙祠矣

香祖
筆記

王士正娥英祠詩灤源通北渚當日祀英皇帝子何

年去靈祠幾代荒九歌怨蘭芷二水似瀟湘彷彿雲

和瑟青峯寫恨長

黠凡續集

武廟在武場東

舊志

許天寵重修武廟記畧濟南南郊里許為演武場場東偏為周師尚父武成王廟公以鷹揚之烈佐周尊賢尚功實開齊祚歿而廟食於齊宜也韜畧之書為萬世言兵之祖祀公於武場又宜也顧神靈之所棲必廟貌崇嚴几筵清閤而後可以起人之敬畏乃歷年滋久金碧蝕於蒼苔榱桷荒於杞棘如是而欲神無怨恫人無褻越也得乎天寵展拜祠下慨然修復

蠲吉於茲歲之仲夏鳩工庀材凡殿堂門廡之屬悉舉而新之升其庭肅然如神之陟降焉對越其容儼然如有所見聞焉敬為迎神送神之歌以祀公康熙八年歲次己酉仲秋提督山東等處地方軍務總兵

官左都督許天寵撰

碑據

閔子祠濟南府城東門外五里宋熙寧七年濟南太守李肅之即墓前置祠立碑蘇子由作記東坡書

齊乘

閔子祠一在城東一在城東門內知縣張翼明建

府志

蘇轍記歷城之東五里有邱焉曰閔子之墓墳而不廟秩祀不至邦人不寧守土之吏有將舉焉而不克

其祀曷表勝觀以式邦人嘉靖壬辰詔天下毀淫祠
於是有司議毀華陽值撫臺袁公釐革廢政爰秩祀
典迺進藩臬諸君謀曰祀淫匪毀成匪儉匪藝典
將廢匪儉民將戕盡存而新之以正易淫傳曰先成
其民後致力於神如之何維時按臺方公稽古禮文
則復進諸大夫謂曰祀欲正報欲隆舉欲不廢慎之
哉欽不敏從諸大夫後乃退而言曰予嘗登華不注
有遺慨焉逢丑父之忠簡焉烈矣閔子騫之孝純焉
至矣華泉取飲脫君虎喙茲非此地乎而費之廟食
幾為華陽之墟矣予安得已於慨耶予聞古之君子

生於其鄉則社祀勞於其地則邦祀死於其土則墓祀是故社祀以昭靈也邦祀以徵勞也墓祀以寧魄也思不忘故也故祠之言思也過畫邑者必思蠲入孝里者必思巨發華不注而不弔逢閔二公如忠臣孝子之思何諸大夫曰祀以崇報報以立功忠孝臣子之大防也勸斯至矣乃復起而言曰明興百五十餘年士大夫以宦業鳴東土與鄉先生歿而祀於社者何可勝紀然不曰有功德蓋六郡譽望起一鄉者乎是故名宦自鐵公鉉而下吾得二十一人焉鄉賢自黃公福而下吾得十有九人焉雖專祀一方奚其

愧諸大夫曰禮以義起義協則稱數君子逢閔之徒
也可合以祀予乃具請於兩臺咸報議可遂易華陽
宮為崇正祠頽者起之腐者新之有堂有門有廡有
亭有庖有湑有龕有座其外固以周垣表以石楹通
以津梁引以川源其制敞煥觀瞻維肅其祀則逢閔
二公居於中國朝諸君子並列左右春秋歲祀著為
令云君子曰閔靈據勝得其地抑邪扶正合乎經存
舊為新節乎費舉逸修曠飭乎典景賢勵俗寓乎教
一事而數美備焉弗述將泯焉已乎鉞無能為役姑
志其始末而系之辭華山巖巖華水湯湯雲氣磅礴

明神是藏翼翼新祠誰其作之顯顯中丞允維度之
曰昔華陽龍宮赫奕彼淫弗翦正氣斯蝕正氣維何
為忠為孝岳峙川流日星同耀忠不避難孝亦底豫
挺挺哲人為砥為礪坎其擊鼓俎豆肅雍神之降止
居歆既同百爾君子有君有父式瞻永懷奕倫罔斁

上同

華不注山下有廟內祀五帝像及主而書其主曰青
帝勾芒氏赤帝祝融氏白帝蓐收氏黑帝元冥氏其
中獨無黃帝不知何人所為歷城志云舊為華陽宮
嘉靖十一年巡撫袁宗儒改為崇正祠提學陸鉞記

祀逢丑父閔子騫兩廡祀鉞鉉等二十二太極殿
十九人今廢仍為華陽宮祀四季之神稱為四季尤
不可解按禮記月令五帝與五行之官各自為神文
義甚明家語孔子曰凡五正者五行之官名五行佐
成上帝而稱五帝太皞之屬配焉亦云帝從其號昔
少皞氏之子有四叔曰重曰該曰修曰熙實能金木
及火使重為勾芒該為蓐收修及熙為元冥顓頊之
子曰黎為祝融共工氏之子曰勾龍為后土此五行
者各以其所能業為官職生為上公死為貴神別稱
五祀不得同帝今乃合之為一豈非并月令家語而

未之見者乎

山東考古錄

關帝廟即今武廟在厚載門街

漢壽亭侯前將軍關公廟在德府後歷下從祀以數百計籤筮之靈則西龕城內法像之古則東郊外名勝之地則馬跑泉密脂泉餘不可枚舉萬歷末年名號不經今按祀典仍稱其舊

舊志

按舊志武廟武場東為武成王廟也今以關帝廟為武廟祭期春秋二仲上戊及五月十三日後殿祀帝三代與崇聖祠同

阿爾泰關帝改謚新廟記乾隆三十五年正月二十

一日

皇帝允山東按察使沈廷芳之請

勅廷臣議易關帝原諡議上

欽定神勇二字布告中外於是綸音所播凡通都大邑下逮遐陬絕徼靡不崇飾廟貌以易觀惟山東密邇畿輔奉

詔最先泰叨撫是邦夙仰靈威既敬書新諡顏諸廟中并謀所以迓神庥而光鉅典者屬沈君廷芳即會城廟宇重加修葺竊惟

國家追崇賢聖發潛闡幽所以風厲天下者甚具而於神

勇為尤至雍正間既定例祀其先代又諱其名幾與
闕里比隆而易諡之典復見於今豈非顯晦有時軼
羣絕倫之藁哲必待

盛世而益彰與夫

上之欽崇神勇謂仰其至大至剛之義浩然流行故能從艱
危百折中一以至誠生變化雷動風飛排折姦雄震
懾華夏歸鼎於正統炳大義於春秋崢嶸配道慷慨
成仁其氣充塞乎兩間俾千萬世奉其明威溥之溥
海內外靈踪陟降與元化綢繆同流上下非天下之
至神天下之大勇其孰能與於斯自漢後主

來歷千幾百年承襲缺謫未能更易至

聖天子折衷定論遂為不刊盛軌神人交暢遐邇肅將瞻升
楹刻桷之巍哉有以知呵護之孔長也已廟在城東
北隅宋指揮使張瑾所建明嘉靖時德藩始充拓之
國朝康熙五十八年布政使王君用霖重修至是再拓而

新之計木石瓴甍之屬工役之需糜白金千七百有
奇經始於是年五月十三日閱兩月而告成大小寮
案咸踴躍欣助而圖度興舉者歷城史令錦實有勞
焉沈君以記請即書諸麗牲之碑時乾隆二十五年

八月朔日勒石

據碑

福齊惠應龍王朝在府治西芙蓉街東雍正五年奉

旨頒送

神像於省城設祠掌祀歲時撫臣率屬致祭

岳通志

劉猛將軍廟有二一在布政司東街一在鞭子巷

布蘭泰修建劉將軍廟記畧山左民殷土厚所慮者

惟水旱不時螟蝗為害我

皇上御極以來勵精圖治百神受職又

命禮司令直省地方立劉將軍廟凡以國之所重在民民之所

重在穡而害穡者莫如蝗驅蝗者莫如神也維茲省

會為六郡觀瞻尤不可不肅崇廟貌大興祀典予秉

藩山左遂將前藩司李諱成龍書院前堂改為劉將

軍廟以妥神庥其後樓仍奉李公位以誌甘棠請於
大中丞陳公商之觀察使董公僉曰允宜爰出俸資
令濟郡姚守董其事尙將軍像而崇禮焉每於丁祭
次日用豕一羊一又以月朔望令地方行香凡以為
民祈福也雍正三年歲次乙巳某月中浣穀旦記據碑
盛百二劉猛將軍廟考劉猛將軍之列祀典自雍正
二年始因直隸總督臣李維鈞之奏也神諱傳聞不
一明季俞黥野廟九歌其一為劉猛將自序云司蝗
之神也蝗背有空神常貫之以繩不使妄為害初不
詳為何代人有云南宋劉文清公諱宰者即詩家所

稱漫塘先生居易錄已辨其非矣饒陽縣志謂是元末指揮譚承忠吳川人弱冠從戎盜皆鼠竄嘗揮劍逐蝗蝗自投境外已而殉國難沉於河明洪武時有司奏請立廟沂州府志以為宋劉武穆公譚錡姑蘇志則以為譚銳乃武穆公之弟而堅瓠集中所採怡菴雜錄載有宋景定四年三月八日勅畧云邇年以來飛蝗犯境浙食嘉禾民不能祛吏不能捕賴爾神力掃蕩無餘爾故提舉江州太平興國宮淮南江東浙西制置使劉錡今特勅封為揚威侯天曹猛將之神則以為武穆者似為可據然神之廟貌並為弱冠

之谷又海寧海神廟猛將位在第四或云彰德屬邑
有劉猛將軍故里姑備述之以俟博識者之深考焉

柳堂
筆談

酈生廟在府城內祀漢酈食其齊乘

淳于孝女祠在府城內漢時齊太倉令淳于意有罪逮

繫長安其少女緹縈上書請贖父罪事詳列女志唐天

寶間敕建見文獻通考府志

檀公廟祀檀道濟在城東北梁家莊後碑據

曾公祠千佛山半崖公嘗知齊州事民懷其德肖像祀

之有正統間碑記府志

張忠襄王祠在府治東南祀元行省尚書張榮

陸通志

張文忠公祠在雲莊明初移於城內在布政司街

同上

黃潛記濱國文忠張公家濟南別墅在歷城縣北十里鵲山之陽歷山之陰曰雲莊公自叅議中書省事退休其中者垂十年至治泰定之間詔使沓至皆堅卧不起文皇御極以翰林侍讀學士召未至改陝西諸道行御史臺御史中丞公乃幡然就道時公年甫六十到官僅三閱月而薨於位天歷二年七月壬午也始公嘗謂吾居雲莊而樂且密邇吾先世大墓吾死必以昭穆序葬而於是乎祠焉九月丙辰公嗣子

今秘書郎引遵治命奉柩以葬而以清河郡夫人郭氏祔至順二年三月戊子乃作祠堂凡屋之為間者四堂居其三而室居其一安神有位物器備完歲時歲事饋奠唯謹以潘忝綴公門生之末俾有述以告來者潛且惟公初尹棠邑撫人有恩用獄不失有罪能使豪強慙服而盜賊化為良民為御史則抗言尚書省不可立其變更法度易置官府且擅除御史大夫中丞非祖宗故事疏時政之弊萬餘言力排權姦幾蹈禍而不悔在中書則諫止內庭燈山之戲卒以忠直受上賞暨執法西臺屬關右荐饑一以荒政為

已任有禱於神其應如響乃傾私橐庀公帑奏請大發錢粟下輸米授爵之令用便宜通鈔法以來商旅繇是人始得食至於疾病死亡皆為區處慮有司怠於奉行則分遣察官臨視之委曲纖悉竭盡其力賴以少甦者雖甚衆而公竟以憂勞悲感及於大故捐館之日奉元鼓樓梁木自壞濟南里第有光若隕星者公之無祿寧非天乎事聞制贈公摠誠宣惠功臣榮祿大夫陝西等處行中書省平章政事柱國追封濱國公諡曰文忠卹典之優異先帝憫悼深矣公所學務致於實用而一語一默之細亦無所苟仁宗時

公居禮部為侍郎尚書兩持文柄克廣賢路深契上
衷新進士銜刺來謁輒拒不與為禮書方寸之紙令
閤人諭之曰但思報國無以私謝為也所撰著施於
朝廷行於四方人莫不傳誦之蓋公之蒞民政多事
異宜如循吏之立祠直道以匡君而勤事以死宦如
功臣之祭於大丞文學議論存乎淑艾之私宜如鄉
賢之祀於學固非其家所得而專也然以公居此為
最久從容去就之際聞者至今為之咨嗟歎息過而
見其生平釣遊處池深木寒猶將徘徊不忍去況登
斯堂而仰公之遺風餘烈可使貪夫廉懦夫立其於

名教殆非小補尸而祝之豈獨仁人孝子用以厚其
親哉潛遂不敢辭而序其槩復為銘以系焉公諱養
浩字希孟世次官闕行事之詳有傳在史氏今又申
勅詞臣勒諸石章昭揭墓隧矣非有關於祀事者此
不著銘曰瞻彼樂郊齊山兩間山之幽幽水清且漣
孰適公歸而止於此使者在門公不為起止非無所
行也以時大君有命賁然來思曰予赤子汝飢予哺
庶幾當宁寬是西顧盡瘁以仕不有其躬神游故墟
有寧一宮公像在斯皇皇眷服生氣凜焉過者必肅

志

方紹倫懷張文忠公詩堅卧雲莊已十年胡為七聘
却幡然須知直為蒼生起忠告遺書付後賢

方昂錄送

七忠祠在西門內祀建文死難臣鐵鉉陳廸胡子昭平
安高巍王省鄭華萬歷間巡撫黃克績黜平安躋丁志
芳學道周應治贊陳瑛記崇正十三年按察使蔡懋德
推官邱祖德知縣宋祖法重修

蔣志

施閏章記士君子仗義成仁以身殉國九死而不悔
者豈役於其名哉而後人之悲思者徃徃勢不能禁
時不能移崇卑隱顯無所岐視聞風稱慕咨嗟涕洟
不已者無他激於義動於誠而不自知其然也濟南

舊有七忠祠以祀建文死事之七人其人為兵部尚書鉞公鉉禮部尚書無太子太保陳公迪刑部侍郎胡公子昭都督僉事平安都督府斷事高君巍東平州吏目鄭君華濟陽縣教諭王君省以數公先後捐軀皆嘗有事於茲土者也萬歷三十九年巡撫黃公克績謁祠始黜平安進監察御史丁君志芳謂平安就擒曾事文皇帝為大寧都指揮使及帝問無恙始自經死故也嗟乎平安血戰奮不顧身文皇幾危者數矣不可謂不忠而以其死較晚隱忍隳節君子斥之若丁御史潛遣妻子不屈而死族人諱忌且百

年陵谷遷徙臺使者始表祀之得與七人之列何其
義終不泯也豈不可懼且勸哉方文皇之乘勝而南
也若疾風捲穽旦暮渡淮而濟南為天下之中地所
必爭鐵公時為布政司叅政輒芻粟收潰兵與胡高
諸公死守濟南兵圍數匝及三月不下當是時文皇
欲引兵北還而使天下得鐵公等數人靖難師必不
南而卒以身殉天也予至濟南問鐵公給文皇入城
懸板幾中處即今西門也未嘗不仰首嘆息泣下又
聞公誓師水而亭高君賦詩見志述一時忠勇之士
甚衆其人姓名或傳或不傳痛惜久之而陳公抗節

死最烈先是曾為山東左叅政多治蹟濟人思之與
鐵公等故七人者不出百年立廟血食生氣凜然可
以見忠義之感人歷久而不替也自萬厯至今垂五
十年地數苦兵求拜其祠而已化為芻牧之場矣按
祠碣故有祭田閏章請於臺使者徵祠田二年之租
益以諸公之捐索刻期修繕丹楹崇宇視昔有加鄭
王二君秩卑皆鐵公僑舊附別祠於東廡祭者不至
穢褻尤甚予謂鄭君嬰城死守王君以頭觸柱義至
高合而饗之隆其祀也位則東西侍昭其等也廣其
別祠為前楹遽其宇也祠田凡六十八畝歲租畝一

金有奇以供祠事可永不廢主者怠失其業復畝而
復之者為分巡濟南僉事陸君朝英而庀材鳩工則
都使司李君承恩之力最多云

恩山集

許公祠水面亭東

舊志

殷士儋記正德己卯宸濠反於江西許公以按察副
使不屈死之今天子即位首詔褒錄贈公左副都御
史諡忠節官其子瑒世錦衣衛正千戶尋用廷臣議
謂公死事尤烈再贈禮部尚書後兵部覈奏公為樂
陵令時蕪盜劉六齊彥明等起所至破城邑殺長吏
勢熾盛諸省戒嚴辛未六月賊黨犯樂陵楊家店復

從海豐冠縣境八月賊偽劉七擁衆二千騎突至縣南關餘黨以二千騎掠縣西黃家店當其時皆樂陵令身率所練壯勇出奇設伏大破之部諸弩士襲擊追射無不應弦踏斬首六十五級生縛其酋黨二十四人僉事兵備武定時賊劉六楊寡婦大舉攻利津急僉事新督郡兵往勦追及高苑斬首四十八級賊劫德平引兵趨救德平至楊二店遇賊與戰一鼓殲焉山東賊悉平計先後俘斬首虜二百三十有奇奪獲被鹵口數器仗無算中功賞格宜叙奏上特命加饒其子世錦衣衛指揮僉事聖朝表忠勸功恩渥備

矣休哉初公舉戊辰進士授知樂陵有功超拜山東
僉事奉璽書兵備武定賊平省兵備乃還分臬濟南
復往巡遼陽及還江西遂自遼陽過濟南攜家還留
固陵而身獨往蒞事蓋自筮仕宦山東且十載戊寅
抵江西逾年難作予早歲聞諸父老談許公率其親
所覩記不獨禦寇一事在樂陵興學造士平賦役息
刁訟鉏悍異儒傲俗丕變先賊未至繕城濬隍教民
戰守具甚備推誠待下與衆同甘苦故人樂效死開
府武定郡縣貪吏望風遁去諸興革裁創軍民咸便
率經久可施行簡卒乘募勇畧選引強士訓習遠射

制連挺鬪械授攻擊止齊法卒用是勝土人至今習
之稱長技焉治濟南政先仁恕務盡下情數平反寃
獄絕口不言戰功或問之遜謝不對謙厚不伐如此
其平居治行敦大體不愧古循吏至用兵料敵決勝
神妙不測能以寡覆衆雖史籍所稱元戎宿將知兵
法者不能過噫當濠未反也設公得專行其志如山
東時必能先幾制變當使勝算在我濠中有憚不反
江西可幸無事矣謀格幾失令束手俟變徒誓一死
報國與倉皇無策窮蹙而死者等公之初志豈遽止
此已邪樂陵先有生祠武定有破賊安民碑公既歿

樂陵武定遼陽思公不已又各相繼於其地立遺愛祠咸若曰公有大造吾土祀典所列法施民勞定國禦菑捍患公皆備之不以其死事江西云蓋語死事江西最著江西之人目擊其變故嘆憤駭異惟死之重而才猷之蓄事功之素多置弗論語功烈山東最深山東之人身被其澤故哀思慕戀惟惠之懷而過化殊區歷世滋久益篤不忘夫各有所感也濟南山東會城舊有崇正祠祀國朝名宦鄉賢適乎一省者公預矣嘉靖辛酉巡撫鎮山朱公巡按漢樓劉公始從士民之請立祠湖南書院西俾祀公巡撫高泉謝

公石洲張公巡按容堂吳公谷南高公繼至咸樂成
之藩臬郡縣諸君子罔不胥贊祠有堂有垣有坊有
筵器具咸備且飭遺像凜然瞻謁悚惕伏臘饗獻者
庶悅懌祠既成濟南守魏公蒙書幣請記其事惟公
精忠大節人人皆知之人人能言之儋也東人也特
表其宦績勛勞著於山東者俾刻於石以告來世觀
者跡公所能為考其所不及為蓋深有足悲焉嗟嗟
一死豈公所難一節何足以盡公爰系之辭曰蓀壁
兮葯房繚蘅兮蕙若兮庶瓊芳神宇臨兮中洲凜英風兮
滿堂絃瑟兮交鼓陳瑤羞兮酌醴醑紛進拜兮延佇

靈昭昭兮欲下來風霆兮駭驚矯撫劍佩兮光陸離
睠風游兮顧懷慰我人兮永思繄大造兮東土粵多
歷兮年所歎去我兮安適嗟權分兮志沮惟慷慨兮
成仁勵臣節兮終古泰山巖巖兮東海湯湯公名與
高兮公澤與長神游八極兮耀景光來不可知兮去
何方東人哀思兮何能忘千秋享祀兮垂無疆

舊志

守仁

舊志

按二公祠後合祀許公於內名三公祠乾隆三十
四年巡撫富察學章又增提學施公閔章布政使

黃公叔琳二主於內名五賢祠

五賢祠

韋謙恒記己丑秋七月予將試濟南諸士循例視學
都人士合辭請曰故督施公愚山先生黃公崑圃先
生模楷人倫陶冶後進流風遺澤久而不忘大明湖
畔舊有三賢祠祀許忠節薛文清王文成三公請以
二公附予避其言集有司議僉以為人心所同其從
之便中丞富公乃大書榜額易祠名為五賢命尹亭
山方伯奉主入祠灌獻成禮越月試士畢予率諸生
步謁焉且招諸生告之曰黃公以康熙戊戌來典學

距今已五十二年施公提學則在順治丙申丁酉間
今且百餘年矣諸生聞其風而慕之蓋以二公之教
澤漸人者深故雖不獲親聆其訓迪猶嚮嚮然必欲
俎豆之而後快顧亦思二公之講學也其有不詔爾
以敦倫飭紀砥行立名處則為鴻儒而出則為名臣
者乎其有不詔爾以根柢六經穿穴諸史於漢唐宋
元明諸大家而卓然成一家之言者乎使者不敏懼
無以益諸生諸生誠思二公之所以為教而兢兢焉
靳無負乎二公則諸生進矣諸生成唯唯而退予乃
泚筆為之記且作迎神送神曲俾諸生歌以祀二公

焉

明湖之水清且漣兮釀為酒漿祀三賢兮維我二公
無黨偏兮以配前喆相後先兮譬彼五緯乃麗天兮
神之歸來靈旗翩翩兮

神之來兮坎坎擊鼓神之醉兮式歌且舞若有聞兮
神之告語端歟躬兮毋佞爾矩毋溺於今兮而不思
古神之駐兮其長有茲土頌服神之教兮以錫我純
嘏

原缺

朱公祠在閔子祠東祀巡撫朱衡有坊曰高山仰止
僊令祠縣治東祀知縣張鶴鳴

遺愛祠運司西祀運使甘一驥

黃公祠西門外祀巡撫黃克纘李同芳李長庚

趙公祠西關菜市祀巡撫趙彥平蓮妖有功

王公祠迎仙橋內祀巡撫王在晉

曹方伯祠譚城驛西祀布政使曹爾正征白蓮教措餉
著勞岡山兵敗陣亡家屬親詣弔恤軍士感泣

李太守祠譚城驛西祀知府李天經白蓮教之亂天經
為太守簡兵措餉著有成勞故祀之

吳令公祠譚城驛西祀知縣吳阿衡討白蓮教守城有
功

朱公祠大明湖上祀巡撫朱大典平東有功一在趵突
泉東皆有董其昌記

李義士祠獄廟內東祀明義士李端以家貲修獄廟且
素行直方乃攀龍祖也

張公祠西關舊天王寺內祀右都御史張鶴知縣呂黃

鐘重建

以上俱舊志

雙忠祠在西城仙臺里華家井街祀明忠臣巡按宋學朱知縣韓承宣康熙丙戌建有王士正雙忠祠記趙申

季雙忠泉記二碑

續縣志

王士正記濟南故有雙忠祠祀前明巡按御史宋公歷城縣知縣韓公也其祀兩公奈何先是崇正十一年

大兵入畿輔徇山東將薄濟南巡撫都御史顏繼祖被旨移鎮德州阻河為守以戲下兵三千往濟南所有僅

羸卒五百及萊兵七百人兵備單寡緩急無足恃人情洶懼宋公時東巡駐章邱聞警投袂起曰濟南省會重地藩封在焉顧守備單寡如此吾不知其所終矣乃介馬馳入濟南七疏請援兵而闕高起潛握重兵翱翔東昌臨清間不發一旅東向事且急公請於德藩出內帑犒軍鼓以忠義登陴誓死守

大兵築長圍肉薄急攻九晝夜轉輸斷絕外無虵蟥蟻子之援城遂不守宋公不屈死之起潛以德藩淪陷懼疏言御史阻遏援兵冀以自解命下撫按覈實以聞於是尚書徐石麟都御史張瑋等合疏言御史職非

守土學朱開警馳入危城誓以死殉忠不避難慷慨
蹈義合照御史張銓王肇坤例一體贈卹事未及行
而明社屋矣南渡贈大理卿而韓公已先贈光祿卿
諡忠烈當是時土人思兩公之德哀其死甚烈建雙
忠祠於郡城之西蓋七十年矣

國朝定鼎宋公以子德宜官拜大學士贈如其官韓公以
子世奇官巡撫贈工部尚書論者皆以為兩公忠義
之報天道灼然如此而歲月寢久祠祀圯廢康熙四
十三年宋公之孫廣業以僉事來為監司明年韓公
之孫鎬知濟南府事愔念濟南為先公殉節地政事

之暇咨訪遺獻得祠址於仙臺里木主尚存居民房
氏愴然流涕有志興復而六郡士大夫洎歷之耆老
思兩公之德久而未沫請於開府藩臬即故址鳩工
肇始六月二十有一日閱三月而潰於成輪奐有加
於舊於是六郡士大夫書來請記其事予聞之國君
死社稷大夫死衆士死制禮之訓也忠信以為甲冑
禮義以為干櫓劫之以衆沮之以兵見死不更其守
儒之經也委質為臣不幸而丁衰亂之世又不幸而
處危疆存亡之秋雖有宏濟艱難之畧無所用之成
仁取義惟一死耳古忠臣烈士如隋堯君素南唐劉

仁瞻宋李節元余闕其死可以動天地泣鬼神身膏
草野而名蔽天壤雖與日月爭光可也以兩公之事
衡之何多讓焉傳有之曰法施於民則祀之以死勤
事則祀之能捍大患則祀之齊人之祠祀兩公也合
於禮矣傳又有之先祖有善而弗知不明也知而弗
傳不仁也僉憲太守之愾慕而興復是祠也非古君
子仁者之用心哉予濟南人也思兩公之風烈數十
年於茲一旦躬逢盛際不可以無言爰述兩公殉節
顛末以為之記宋公諱學朱字用晦江南長洲人明
崇正辛未進士韓公諱承宣字長卿山西蒲州人明

崇正甲戌進士啟正間名相蒲州公從子碑據

賢良祠在湖上碧霞宮側碑據

忠烈祠祀明布政使張秉文在小布政司街路北同上

羅公祠在西關祀濟南知府羅文瑜同上

佛公生祠在西關祀巡撫佛倫田雯有記府志

歷城縣志卷第十二

建置考三

學校

古者合國之子弟必釋奠於先聖先師文廟之建固簪宗之遺也乃郡邑之間率有廟而無學志郡邑者亦多侈陳禮器樂律以為博其果有合於直溫寬栗之義乎夫三代之遺制渺矣自漢以來文翁之化蜀韓昌黎之治潮州胡翼之之教蘇湖非有高遠難行之事也

國家崇經重儒九隆太學濟南密邇

帝畿棧樸之化實先被焉果使羣萃州處取漢宋遺矩而斟

酌行之未必不足以樹十郡之儀型也茲姑即舊志及碑刻所載以志其創修之始末而社學書院皆附焉

縣學

歲入生員二十名

歷城縣儒學舊在縣治東成化十四年知縣賈宣遷縣治東北十九年教諭聞璉增置殿廡堂齋塑聖賢像正德八年知府章寓之拓學路通南衢立青雲路

坊嘉靖二年建射圃

陸通志

歷城縣學舊在縣治東隘巷

即今尹巷

成化戊戌巡撫許

公遷而廣之有提學畢公瑜記萬歷甲午知縣張鶴鳴重修庚子知縣陳采建奎樓於巽方天啟壬戌知

縣吳阿衡改敬一亭為尊經閣己卯尊經閣明倫堂
皆燬正殿亦就圯志

文廟每歲春秋仲月上丁日致祭以先賢先儒各配

從祀

大清會典

歷城縣儒學康熙二十一年知縣史起貞重修邑人

孫光祀撰記先師廟及東西廡康熙二十九年布政

使衛既齊重修有記啟聖祠在廟東奎樓下康熙二

十年知縣史起貞重建

府志

名宦祠在戟門右康熙二十五年知縣郝惟謙建

同上

按名宦祠久已傾圯據縣志列名宦者周三人齊

卿鮑叔牙管仲逢丑父漢四人濟南亭長顏異濟
南相韓千秋濟南王太傅何敞東平陵令劉寵北
魏四人濟南太守鹿生齊州刺史韓麒麟薛聰拓
拔子華北齊一人齊州治中從事房彥謙隋五人
齊州刺史韋藝別駕趙軌叅軍王伽齊郡太守元
褒郡丞張須陀唐四人齊州刺史徐彥伯王志愔
叅軍李務光濟南太守李隨五代一人齊州防禦
使郭瓊宋十人齊州防禦使李漢超推官趙師民
知齊州王巖叟范純仁曾鞏晁補之李常王吉甫
掌書記蘇轍知濟南府事張叔夜金一人山東東

路轉運使楊伯淵元六人濟南路總管趙炳王楫
山東東西道提刑按察使胡祇通同知濟南路總
管府事趙孟頫山東廉訪使張昇于欽明八十四
人山東行中書省叅知政事安然巡撫何文淵張
驥年富盛頤牟倅原傑黃瓚方良永應價宋應昌
黃克績趙彥呂純如陳應元巡按陳泰郭觀許進
王相朱節鍾化民姚思仁郭景昌巡鹽畢懋康布
政使徐鐸馬麟劉中敷陸瑜王宇姜洪王質按察
使王越于大節孫燧蔡懋德布政司叅政房安段
民叅議馬諒按察司僉事熊鼎提學道薛瑄楊文

卿王廷相鄒善李化龍涂溥分巡濟南道僉事董
允茂濟東道僉事邱懋德濟南府知府崔亮陳修
徐安白行順趙璜李遷平康裕徐榜懋時英署知
府李格同知王琮衛英張斗知歷城縣侯宣余翺
張淑勵賈仁元張鶴鳴陳采裴鉉呂黃鐘宋法祖
其以死節者則布政司叅議鐵鉉都指揮使平安
按察司僉事胡子昭都督府斷事高巍布政司右
叅議陳廸巡撫徐從治左布政使張秉文分巡濟
南道周之訓攝守巡二道鄧謙署都指揮馮鎰總
運使唐世能知府苟好善同知陳虞允教授孔開

武知縣韓承宣此皆舊志列於宦績者序云長老傳聞宮牆俎豆遺澤如新烏可諉耶是皆祀於學也然多州郡以上之官縣令則自漢劉寵以後不過十人謹詳錄之今百餘年來入名宦者應不乏人而雍正四年分別留祀時知縣楊天成詳文云並無名宦其竟無一人耶則亦姑從闕如而已又按康熙十六年鄧鍾岳名宦題名碑記惟載總督李蔭祖巡撫李綱布政使王用霖知府羅文瑜共四人

鄉賢祠亦在戟門右康熙二十五年知縣郝惟謙建

府志

按鄉賢祠今圯舊志載祀於鄉者秦一人茅焦漢
三人終軍王訢林尊宋七人王杲張揆劉廷式李
格非呂頤浩王衣辛葉疾元四人張榮韓鏞劉斌
張昭明十一人尹旻張鶴邊貢李攀龍殷士儋韓
應元吳開詩趙世卿王見賓穆深趙濬岳通志載
留祀者六人朱昌祚朱宏祚孫建宗葉永宗孫光
祀朱綱而府學鄉賢祠有木主載戴瑞朱綵朱絳
三人今備錄之以俟考

忠孝祠節義祠俱在縣學外

岳通志

按忠孝祠舊志載忠義四十六人漢興子簡唐李
君球方繼伯羅石頭高君狀羅士信宋崔縱醉民
邢希載金周馳元魏中立明鄧瑜辛鎮邦馬斯才
馬真正樂賢忠李季子秦邦賢朱庶樊應科朱常
汧朱常汧朱常汧朱常濬陳載春孫止孝劉勅劉
檄穆遠史臣贊劉化光賈槐張元英嵇嵐胡顯宗
米嘉珠徐暉吉劉汝通丁振王啟亨張允文吳安
邦王敬賢費克謙陳光先楊卓四城巡守義社生
員死者三百五十二人回兵戰死者金陳二教長
共二百餘人楊家寨守義死者百餘人孝子十二

人元劉琮宋懷忠牟克孝明劉興祖王允李華谷
珍羅縉王繼芳趙光榮趙光華王允前岳通志載
近今留祀者李光震一人其邢起龍錢士賢懷世
昌三人現在飭遵核實咨請留祀

節義祠今在城隍廟旁舊志祀節烈婦五十八人
今題旌入祠者共若干人詳見列女傳

明倫堂在橋門後堂上有卧碑一通康熙二十五年

運判金世卿重修

府志

尊經閣在明倫堂後康熙二十五年運判金世卿重
修

教諭宅在尊經閣東

訓導宅一在射圃東南一在橋門西今廢

射圃在啟聖祠後今廢

以上俱府志

按縣學重修年月其各志不載今得於碑刻者順治十二年巡撫耿焞重修又別建奎樓高倍於前康熙四十二年布政使趙宏璧重修五十六年知縣劉元琦重修乾隆二十年邑人張廷璧重修

畢瑜新建儒學記畧歷城縣學舊在府治之比縣治之東隘巷頽然數楹不蔽風雨成化戊戌春有司既煥新郡學知縣事賈宣暨教諭婁偉訓導古鼎謀更

新之一日率諸生來言縣治東北有空閒公館寬廣
爽塏宜易之予時偕按察使李公益等躬往視焉僉
曰宜請於朝而遷焉適巡撫許公進下車之初憲度
一新尤惓惓以興學為務乃命縣丞游寬董其役復
市學傍民居闢而廣之前為學門儀門中為明倫堂
後為講堂皆因其舊而易以扁東西別建兩學堂之
東構宣聖殿及鄉賢祠祠後徧列號舍以居諸生講
堂北并列學官之居而凡倉庫庖湢之所靡不具備
以卑陋為高明化腐朽為鮮麗觀者嘖嘖嘆賞以為
盛舉肇工於是歲之吉至於仲冬始成予於甲午冬

奉命督學是邦嘆斯學凋敝已久今一旦獲徙而新之故特記焉且俾凡助力者並列姓字於碑後用以告夫來者

舊志

楊衍嗣重建尊經閣記畧歷城學宮舊有尊經閣奈鈴風礎雨輒易傾圯前署諭胡公謀所以興之邑侯吳公慨然捐俸以助而鄉士夫以簞金來助者復雲集焉不期月而厥工告成牆則易土而磚臺則易磚而石五間四楹二層兩室悉如舊制其壯麗則視昔有加焉是役經始於癸亥之春落成於是歲之秋邑侯呂公署諭楊公屬予記之蓋將以紀盛美垂獎勵

也

同上

衛既齊記畧歷城舊有學其行禮合樂則縣令博士
實主之一日教諭周謙進言曰縣學正殿頽敗已甚
謙秉邑鐸懼殲職齊聞之慨然爰捐貲庀材大為
修葺而瓦石木植工役計資三百金始於庚午之春
二月成於夏四月乃進諸生謂之曰齊魯為聖賢誕
育之鄉多士親茲廟貌之維新日新其德業將見人
材風俗一變而至於道實自今日始其不徒於廟貌
乎改觀也已予因記修復之歲月而及於此俾鐫之
石至於始建議者厥惟教諭周謙而董役者則理問

魯史也例得並書

志

施閏章登歷城縣學高樓詩海內昔全盛壁下多鉅
公華泉高唱發滄溟著作雄殷許相羽翼侶和成宗
工蕭條近百載零落如飛蓬國史付兵革茂草淪鼓
鐘攘攘游俠兒白眼羞章逢有美二三子拮据守雕
蟲袒褐揖長吏青氈無宿春儒冠不復辨斯文竟鴻
濛補苴備俎豆締構及學宮憑高騁予目宜嶽何龍
從霜嚴凋古柏颺急響枯桐惟餘華不注萬古青芙
蓉尼山亦孔邇孰使吾道東勞歌聊見志寄語雲中

鴻恩山

集

濟南府學

楊載松雪趙公行狀公之為政每以興學校為先務
城東有田八頃皆膏腴地兩家爭之數十年不決責
其券則曰亡之於兵間公曰大兵後執券以相治猶
恐不得直況無券乎遂以為贍學田由是餽廩充羨
生徒來集夜出巡邏閒讀書聲輒削其柱以記之翼
日使人饋酒以勞其勤能為辭章者必加褒美與之
聲譽或授以法度使慕高古至今三十年俊乂之士
遂為天下冠

松雪集
附錄

濟南府儒學在府治西北宋熙寧間建金貞祐板蕩

濟南城空二十餘年元至元間復樹官府學校天歷間教授孔之巖置贍學田元末頽圯洪武二年重建嘉靖十年建敬一亭立御製敬一箴及註釋視聽言

動心五箴碑

陸通志

宋熙寧間郡守李恭始建府學於大明湖南元至正六年庚辰秋八月山東憲曹告朔於廟憲副珊竹忽哩哈赤知事李彥敬乃議修垣廣千二百五十二尺高一丈六尺廣四尺以石築基以白瓦單覆之以瓦宮牆始峻有張起巖記洪武二年崔太守亮重建天順五年陳太守銓修成化十九年蔡太守晟建鄉賢

祠增兩廡像龕樂器正德七年章太守寓之建講堂
萬歷庚子沈太守蒸修引芙蓉泉水入外泮池名其
水道曰梯雲溪櫺星門外左右建方圓二亭天啟丁
卯樊太守時英名二亭曰中規中矩又引明湖水入
巽方為一池蓄金鯉種桃柳建亭其上曰飛躍又引
水西入內泮池由西廡後繞尊經閣而東名曰玉帶
河崇正癸酉圯廢顧太守燕語重修戊寅苟太守好
善重修大殿明倫堂會典變而明倫堂燬舊志

府學中為先聖殿東西列兩廡前有戟門門外有泮
池左右為名宦祠鄉賢祠又外為櫺星門廟後立明

訓授問學為可緩以廟垣修完為非急期望祭不
失期會取具而已以為風俗治道有繫於學校幾何
人哉予故不辭即其實而為之書是役也始於至正
元年三月十五日畢於本年十月二十日監臨董其
事以底於成者武德將軍濟南路總管府副達魯花
赤喜壽承務郎濟南路總管府經歷穆不花司縣督
工郡士助役則刻之碑陰是為記

舊志

尊經閣銘惟人與物同具此形物得其氣之偏人得
其氣之翳曰翳伊何萬物是生以為所見之或蔽則
私欲馳騁而無極聖人出而是正敷天倫之叙昭垂

乎六經所以為百王之觀法為萬世之儀型賢哉張
公尹茲山城構傑閣於泮水揭尊經以為名考其命
名之本意信乎見道遠而燭理明想其文化流行洽
於民情禮讓之風以興絃歌之聲日聽力行乎正途
而不倦心醉乎至理而不醒日新又新之無已可不
謂明德之維馨若然則公之化斯民也庶幾三年之
成彼其銜智能之末技聚黃金而滿籬斷喪本心之
善能不抱媿而過斯庭噫池間偃月樓高摘星在一
時為觀美曾不遺千載之餘腥金山可傾閣不可傾
金山可平基不可平壯吾道之元氣至萬世而崢嶸

青青子衿於焉研精來游來歌請觀斯銘上

同

夏寅記畧成化癸卯予來撫山東吏部尚書尹公謂予曰濟南學校雖修而未有記子其圖之既至巡按御史宋公經謀於藩臬諸公作新學校蓋務完美右建鄉賢祠以配左之文昌增兩廡像龕樂器設二大屏於戟門外又於街之東西立二牌一曰鍾英一曰毓秀蓋自成化丁酉巡按梁公澤尹公命協謀方伯陳公儼阮公勤長憲周公晟提學畢公瑜憲副石公渠後並以巡按許公進長憲李公益悉任同知徐宣董其事凡增大成殿廣兩廡建戟門櫺星門饌堂明

倫堂庖庫房師生僻舍以及堂後環碧亭為間百
有五十丹墀綠甍壯麗宏休其間聖賢黼座章服樂
器咸一新焉歲己亥落成甘露降於文廟柏樹者三
斯實聖靈慰憐天休滋臻也諸公雖代去例得類書
而尹公汲引後學之盛心則固諸士子所宜體悉者
也因為之記

府志

元好問濟南廟中古檜詩同叔能賦亭亭祠宮檜鬱
鬱上雲雨扶持幾年造物心獨苦青餘玉川潤根
入鐵岸古雖舍棟梁淒斤斧安得取沈沈地中久駭
浪思一鼓天柱屹不移水國奠平土乾坤此神物甲

乙存世譜瀨鄉留耳孫闕里傳鼻祖秦松從自汙蜀
柏聊共敷會待十抱成茲焉重摩拊

道山集

書院

附

子產不毀鄉校齊宣猶重稷門育人才美風俗書院又
曷可少也歷下以書院名者四曰至道曰閔子曰白鶴
而最後乃曰歷山方當盛時合六郡人文較藝其中伊
吾之聲與趵水接響黃中丞撫歷十餘年山水皆所登
涉一日問左右曰濟南名勝何地未至左右以書院對
中丞喞然曰書院乃賢士之關豈酒遊地乎重斥其人
而止無何驛舍摧殘偕供駐節已而銀瑤大帥橫踞精

一之堂點胥健兒猥蹲瞻碑之畔畢直指聞之寧不悔

為多事耶

舊志序

至道書院大明湖上江右鄒公善建原名湖南後更今
名號舍若干間學田若干頃聚英才而教之名卿碩輔
皆出其中張江陵時改為提學道

舊志

陳講湖南書院士田記畧自王教弛而後書院作所
以萃雋專業倡道化而風學校然匪財無以聚人匪
養無以成教田者財之所出教之所由成也在宋白
鹿石鼓岳麓睢陽四大書院皆置田養士載在地乘
可考天下通著大郡必設書院未能久其教者無田

也山東本孔孟之鄉濟南又首善之地中丞大夫
蔡公經胡公績宗侍御張公鵬李公松先後撫按茲
邦茂宏化理申勵人文廼下濟南守司馬秦相於大
明湖濱改創佛宮作湖南書院遂問田於歷城得景
陽廣平白雲三湖官田割附百二十頃以聽諸生名
曰書院士田又屬副使姚君文炤劑量裁酌準田之
入約士之費日給有等又推其餘以逮兩學之士凡
少不克娶死不克葬者亦覃厥施焉由是齊魯之士
彬彬萃止橫經執業如泥在鈞如金在鎔嗣以歲月
駸駸有造矣司馬守列其田數勒諸鉅石以昭久遠

諸公臨其堂指石以誨諸生曰二三子獲卒業於書院者非以有是田與請以農喻學可乎百夫所授播之皆同而不能保其皆獲者何哉毋亦以天時人事之弗齊與故君子之學以仁義為田以誠敬為耜以克己為耘耔以樂業為澆培充之裕一身廓之保四海不亦力穡其有秋哉苟或暴殄以伐性淫僻以蕩心掇文辭以撤本擷聲華以先實是不殖則落矣二三子勉之慎勿為老農所咻哉諸生再拜曰命之矣予喜聞其說遂退而作記時嘉靖丁酉望春日也

同上

閔子書院在縣東五里閔子墓前元天歷間建設山長

大清一統志

劉勅改閔子書院名講孝堂

舊志

陸鉞閔子書院詩季氏今無邑費公還有堂松楸汶水北俎豆華山陽春草寒猶重蘆花絮不揚采蘋聊

駐節彷彿見宮牆

陸通志

白鶴書院城北三十里邑人周居岐建今廢

舊志

歷山書院趵突泉東巡鹽御史畢公懋康於萬歷甲寅年建其制中為精一堂六楹堂後有穿廊有後堂六楹庭四楹各有配房四楹週圍書舍數十楹堂前為儀門左右有掖門儀門前有橋引白龍泉水經趵突泉前東

注之復會酌突泉前為大門四楹門前有坊曰歷山書院初六郡士子讀書其中者以百計天啟初為郵亭士人不敢過而問矣

川上社殷文莊主之嘉靖丁丑公以簡討居憂授徒課藝踰年售張中鵠周繼劉宗禹三人次科售鄭傑洪一謨二人未幾召入而社廢

金線泉社陳九疇主之成進士者六人戴春繼主之成進士者四人

白鶴院社周司農繼主之相繼售者數人

歷山社知縣黎國器主之設几縣庠官給襄廩考次疑

最士風翕然丕振

明湖大社呂中丞純如主之命樊太守時英董其事諸生二百餘人

歷山大社崇正丁丑于糾同人為此社每會五十七人自餽食糊名易書浸及百人私館莫容會知縣韓承宣下車聞之令入書院會擇優卷送縣詳覽刻行二載人文丕變未幾以兵變罷

社學南門內外各一東西門內外各三嘉靖四年督學鄒公善既修至道書院因徧葺社學有碑記在迎祥宮

後今皆圯廢

以上俱
舊志

國朝白雪書院在趵突泉西

岳通志

按白雪書院即明之歷山書院

張貞重修白雪書院記畧康熙庚辰崑山徐公視山東學政壬午歲科兩試竣拔六郡之士百二十人使聚業於白雪書院廣齋舍置庖廩日給以酒漿筆札之費公時時臨課為之談說經史指授義法而其大指在敦實行崇正學不徒追逐於言語文字之間以苟利達公父大司寇公博學嗜古家多秘籍六經傳註購致尤勃網羅漢唐以來諸家箋疏數千卷刻之家塾卷帙浩繁世人罕覩公取全部度之後閣恣學

老繡閣以廣見聞故多士濯磨鼓勵揖讓周旋彬彬
都雅有鄒魯之遺風焉白雪書院緣起於李公攀龍
創造於侍御畢公懋康繼修於方伯衛公既齊至公
而後規模大備蓋昔人肇其端而公觀其成也公名
家世胄射策甲科束髮登朝回翔郎署一旦作師於
孔孟文學之邦冰蘖自矢苦意研搜所進退升降博
士弟子貧若匠石操斤而程材樽櫛稷闕罔失尺寸
不惟賞拔者知榮即所抑置亦莫不聳趾慚奮也故
所取文皆精深古雅兼備衆體按部所至其有忠節
名臣必闡發幽隱躬薦椒馨復周爰咨諏其子弟賢

而有文者列之庠序即其後裔零謝流為氓隸亦必
資以金帛使足自給又虛懷善下自視歆然末學布
衣一言之善一藝之長莫不誘掖獎成津津樂道不
啻如口出壬午夏日貞過歷下一時博士弟子感公
誨迪之恩請為白雪書院作記以草野之言質直信
而可徵也公諱炯字章仲一字自強舉康熙壬戌進

士康熙壬午九月

據碑

王革中丞丹徒張公南溟方伯晉江黃公天馭重葺
白雪樓社集同趙孝廉豐原紀事詩二首檄來舊雨
人清詩都上卷快風活水邊哦罷秋聲顚頻憶滄溟

公詞場經血戰文采老於菟中原奉最殿是時只弁
州投句如郵傳餘子各崢嶸祇充坐末選令子復能
文家風應不變再傳胡飄零麥飯春風言感之重遷
回就葉燒破硯

又有邊華泉先公稱五子亦有許殿卿與公起我里
推挽何膚功大雅正如此華泉盛元音雅南差可擬
殿卿自貽宕于公附庸耳何當盡銷沉淒斷貽秋士
垣崩右史樓草沒尚書第詎如亂泉頭一樓歸然峙

下有擔書人不異槐花市

二十四泉
草堂集

龍章書院在珍珠泉

志通

按龍章書院巡撫李樹德建

振英書院在東城下按察使黃炳建

據碑

樂源書院在西門內大街縣治西南雍正十一年

下省會之地仍各建書院以作育人材歲發帑金以資膏

火巡撫岳濬因舊裁都司公署高敞整齊乃倡捐修葺

凡講堂齋舍庖湔器用俱備

岳通志

乾隆二十六年山長桑調元建朱子祠於後以陸龍

其稼書張履祥考天勞史麟書三先生配有碑記

碑

劉藻書院詩鎖院春光寂雲開日乍醒草肥迎砌綠

山瘦入堂青靜得琴中趣閒書座右銘有人來問字

相與細談經

篤慶堂集

桑調元書院新鑿華池詩我愛華泉好當春甃一池
飛來天上月映徹水中坻蘭渚流杯曄瑣溪把釣絲
端須映林竹底用卜龍鰲富貴浮雲耳形骸放浪之
渾消太虛影俯見雪霜髭沙宿連拳鷺泥行曳尾龜
本無康濟具不是遯清時

張甫集

樂口義學鹽運使李梅賔建

碑據

王舍莊義學淄川李某即張揆故宅建有田若干畝

同上

歷城縣志卷第十二終